

VENDIM
Nr. 123, datë 19.6.2024

**MBI FILLIMIN E PROCEDURËS, PËR SHQYRTIMIN E KËRKESËS SË
SHOQËRISË “NOVA PROSPECT” SHPK, PËR LICENCIM NË VEPRIMTARINË E
PRODHIMIT TË ENERGJISË ELEKTRIKE**

Në mbështetje të neneve 16 dhe 37, pika 2, germa “a”, të ligjit nr. 43/2015, “Për sektorin e energjisë elektrike”, të ndryshuar; të neneve 4, pika 1, germa “a”, 5, pika 1, germa “a”, dhe 10, pikat 1 dhe 3, të “Rregullores për procedurat dhe afatet për dhënien, modifikimin, transferimin, rinovimin, njohjen dhe heqjen e licencave në sektorin e energjisë elektrike”, të miratuar me vendimin e Bordit të Entit Rregullator të Energjisë (ERE) nr. 109, datë 29.6.2016, të ndryshuar; si dhe të neneve 15 dhe 19, pika 1, germa “a”, të “Rregullores për organizimin, funksionimin dhe procedurat e ERE-s”, miratuar me vendimin e Bordit të ERE-s nr. 96, datë 17.6.2016; Bordi i ERE-s, në mbledhjen e tij të datës 19.6.2024, mbasi shqyrtoi relacionin me nr. 1488/1 prot., datë 11.6.2024, të Drejtorisë së Licencimit, Autorizimeve dhe Mbikëqyrjes, “Mbi kërkesën e shoqërisë ‘Nova Prospect’ sh.p.k. për licencim në veprimtarinë e prodhimit të energjisë elektrike”,

konstatoi se:

- Shoqëria “Nova Prospect” sh.p.k., me shkresën e protokolluar në ERE me nr. 1448 prot., datë 3.6.2024, ka paraqitur kërkesën për licencim në veprimtarinë e prodhimit të energjisë elektrike nga centrali fotovoltai, me kapacitet prodhues 2 mw, me vendndodhje në zonën kadastrale nr. 22960, Njësia Administrative Pilur, Bashkia Himarë, qarku Vlorë.

- Shoqëria ka kryer pagesën e aplikimit, sipas përcaktimeve të aneksit A, të “Rregullores për procedurat dhe afatet për dhënien, modifikimin, transferimin, rinovimin, njohjen dhe heqjen e licencave në sektorin e energjisë elektrike”, miratuar me vendimin e Bordit të ERE-s nr. 109, datë 29.6.2016, të e ndryshuar.

- Nga shqyrtimi i aplikimit, rezulton se aplikuesi ka plotësuar dokumentacionin, në zbatim të përcaktimeve të nenit 9, për pikën 1.1, germat “a”, “b” dhe “c”; për pikën 1.2, germat “b”, “c” dhe “d”; për pikën 1.3, germat “a” dhe “c”; për pikën 2.1, germat: “b”, “d”, “e” dhe “f”.

- Për sa më sipër është konstatuar se nevojitet të plotësohet informacioni/dokumentacioni si vijon:

Neni 9. Formati dhe dokumentacioni për aplikim

Pika 1.2:

- germa “a”: Shoqëria duhet të shtojë në objektin e veprimtarisë së saj dhe prodhimin e energjisë elektrike.

Pika 1.3:

- germa “b”: Shoqëria duhet të dokumentojë në ERE mbështetjen financiare për vlerën e mbetur, referuar përcaktimeve të planit të biznesit, si dhe të depozitojë pëlqimin apo qëndrimin e MIE-s, në lidhje me transferimin e të drejtave që rrjedhin nga kontrata e nënshkruar me MIE-n, e cila është vendosur si një mjet për garantimin e shlyerjes së detyrimeve që rrjedhin nga kontrata e kredisë bankare.

Pika 2.1:

- germa “a”: Shoqëria duhet të plotësojë të dhënat mbi llojin e centralit, *on shore* apo *off shore*, si dhe të paraqesë në ERE dokumentacionin teknik mbështetës, në lidhje me jetëgjatësinë e pritshme të centralit fotovoltai.

- Në kuadër të vlefshmërisë së VNM-së paraprake (deri më 17.8.2024) dhe referuar faktit që shoqëria në shtojcën 2 ka deklaruar se viti i ndërtimit të centralit është 2023–2024 dhe data e fillimit

të operimit 30.8.2024, ajo duhet të dokumentojë në ERE fillimin e punimeve për ndërtimin e centralit fotovoltaiik apo fazën në të cilën ndodhet realizimi i ndërtimit.

Për gjithë sa më sipër, Bordi i ERE-s

VENDOSI:

1. Të fillojë procedurën për licencimin e shoqërisë “Nova Prospect” sh.p.k. në veprimtarinë e prodhimit të energjisë elektrike nga centrali fotovoltaiik me kapacitet të instaluar 2 mw, me vendndodhje në zonën kadastrale nr. 2960, Bashkia Himarë, qarku Vlorë.

2. Drejtoria e Licencimit, Autorizimeve dhe Mbikëqyrjes të njoftojë shoqërinë “Nova Prospect” sh.p.k. dhe Ministrinë e Infrastrukturës dhe Energjisë për vendimin e Bordit të ERE-s.

Ky vendim hyn në fuqi menjëherë.

Çdo palë e përfshirë në këtë procedurë mund t'i kërkojë ERE-s, brenda 7 ditëve kalendarike nga data e marrjes së vendimit, rishikimin e vendimit të Bordit në rast se ka siguruar prova të reja që mund ta çojnë Bordin në marrjen e një vendimi të ndryshëm nga i mëparshmi apo për gabime materiale të konstatuara. Për këtë vendim mund të bëhet ankim në Gjykatën Administrative Tiranë, brenda 30 ditëve kalendarike nga dita e publikimit në Fletoren Zyrtare.

Ky vendim botohet në Fletoren Zyrtare.

KRYETAR
Petrit Ahmeti